

**Pwyllgor Newid Hinsawdd,  
yr Amgylchedd a Seilwaith**

**Climate Change, Environment,  
and Infrastructure Committee**

**Senedd Cymru**

Bae Caerdydd, Caerdydd, CF99 1SN  
SeneddHinsawdd@senedd.cymru  
senedd.cymru/SeneddHinsawdd  
0300 200 6565

**Welsh Parliament**

Cardiff Bay, Cardiff, CF99 1SN  
SeneddClimate@senedd.wales  
senedd.wales/SeneddClimate  
0300 200 6565

Julie James AS,  
Y Gweinidog Newid Hinsawdd

10 Chwefror 2022

Annwyl Julie,

Diolch am eich llythyrau, dyddiedig 17 Rhagfyr 2021 a 3 Chwefror 2022, yn tynnu sylw'r Pwyllgor at gyhoeddi'r Fframweithiau Cyffredin dros dro.

Byddwch yn ymwybodol bod llawer o'r fframweithiau dros dro sy'n weddill o fewn cylch gwaith y Pwyllgor hwn. Ni fydd yn bosibl inni graffu ar bob un o'r rhain o ystyried ein hymrwymadau gwaith eraill. Ar sail y wybodaeth sydd ar gael, rydym wedi cytuno i flaenoriaethu gwaith craffu ar y fframweithiau dros dro ar gyfer Ansawdd Aer, Cemegion a Phlalladdwyr, y System Masnachu Allyriadau, ac Adnoddau a Gwastraff.

Deallwn ei bod yn annhebygol y bydd pob un o'r pedwar fframwaith uchod yn cael ei gyhoeddi mewn pryd ar gyfer ein sesiwn graffu gyda chi ar 17 Chwefror 2022. Os felly, efallai yr hoffem drefnu sesiwn graffu ychwanegol gyda chi ar ôl iddynt gael eu cyhoeddi. Rwyf wedi gofyn i'r tîm Clercio gysylltu â'ch swyddogion i drafod hyn, os bydd angen.

Gwyddom fod y llywodraethau wedi bod yn anelu at gwblhau'r gwaith o gyflawni'r Rhaglen Fframweithiau Cyffredin ym mis Mawrth 2022 yn barod at y cyfnod cyn etholiad Cynulliad Gogledd Iwerddon. O gofio'r oedi parhaus wrth gyhoeddi rhai o'r fframweithiau dros dro, a'r angen i ddarparu digon o amser ar gyfer gwaith craffu'r pwyllgorau, rydym yn amau a oes modd cyflawni hyn. Ymrwymodd Llywodraeth flaenorol Cymru i beidio â chwblhau fframweithiau nes bod pwyllgorau wedi craffu ar y fframweithiau dros dro. *Byddai'n ddefnyddiol pe gallech gadarnhau eich bod yn parhau â'r ymrwymiad hwnnw.*

Er nad yw'r Fframwaith Cyffredin dros dro ar gyfer Sylweddau Ymbelydrol yn un yr ydym wedi'i flaenoriaethu ar gyfer gwaith craffu, mae sawl mater lle, yn ein barn ni, y byddai esboniad pellach yn fuddiol. Byddem, felly, yn ddiolchgar o gael atebion i'r cwestiynau isod.

## Cyffredinol

Mae'r rhan fwyaf o'r Fframweithiau Cyffredin wedi bod ar waith dros dro ers diwedd cyfnod pontio Brexit.

*1. A allwch gadarnhau a yw'r Fframwaith Cyffredin dros dro ar gyfer Sylweddau Ymbelydrol yn un o'r rhain? Os felly, pa asesiad a wnaed o ba mor effeithiol y mae wedi bod yn gweithredu?*

Yn ôl yr adroddiad statudol diweddaraf ynghylch Deddf yr Undeb Ewropeaidd (Ymadael) a'r Fframweithiau Cyffredin (Rhagfyr 2021), bydd cwblhau'r Adolygiad o Gysylltiadau Rhynglywodraethol yn golygu bod angen ambell ddiwygiad bach i'r Fframweithiau Cyffredin i adlewyrchu rôl strwythurau newydd ym mecanweithiau'r Fframweithiau Cyffredin. Daeth yr adolygiad i ben ym mis Ionawr 2022.

*2. A allwch egluro sut a phryd y caiff y Fframwaith ei ddiwygio i adlewyrchu'r broses datrys anghydfodau newydd y cytunwyd arni fel rhan o'r Adolygiad o Gysylltiadau Rhynglywodraethol?*

## Datblygu'r fframwaith dros dro

Mae Cam 2 (datblygu polisi) a Cham 3 (adolygu ac ymgynghori) o'r cynllun cyflawni Fframweithiau Cyffredin yn nodi disgwyliadau a/neu ymrwymadau mewn perthynas ag ymgysylltu â rhanddeiliaid.

*3. Pa waith a wnaed i ymgysylltu â rhanddeiliaid yng Nghymru wrth ddatblygu'r Fframwaith? Sut y mae safbwyntiau rhanddeiliaid wedi cael eu hadlewyrchu yn y Fframwaith?*

## Gwneud penderfyniadau

*4. I ba raddau ydych chi'n fodlon bod y Fframwaith yn rhoi cyfle priodol i Lywodraeth Cymru a'r Senedd lunio cyfraith a pholisi ar gyfer Cymru yn y maes cymhwysedd datganoledig hwn?*

5. A allwch egluro a fydd y Fframwaith yn effeithio ar unrhyw ddeddfwriaeth neu bolisi Cymreig presennol, neu unrhyw ddeddfwriaeth neu bolisi Cymreig arfaethedig, yn y maes cymhwysedd datganoledig hwn, ac os felly, sut?

## Rhwymedigaethau rhyngwladol

Mae'r Fframwaith yn cydnabod y gellir gwneud penderfyniadau rhwng y DU a'r UE mewn cydfforymau amrywiol a sefydlir drwy eu perthynas newydd.

*6. A fydd y llywodraethau datganoledig yn mynychu cyfarfodydd perthnasol ynghylch y Cytundeb Masnach a Chydweithredu?*

*7. Sut y bydd penderfyniadau'r DU a'r UE a wneir mewn meysydd datganoledig gan Lywodraeth y DU yn cael eu cysoni â'r ymrwymiad yn y Fframwaith i gonsensws rhwng y llywodraethau?*

8. *Pa gyfleoedd y mae'r Fframwaith yn eu darparu ar gyfer mwy o gyfranogiad gan Lywodraeth Cymru wrth ddatblygu polisi tramor y DU ar faterion datganoledig o fewn cwmpas y Fframwaith? Sut y mae hyn yn wahanol i'r trefniadau pan oedd y DU yn aelod o Euratom?*

### **Datrys anghydfodau**

Mae'r Fframwaith yn cadw hawl pob parti i 'gytuno i anghytuno' ar faterion o ran cwmpas. Mae hefyd yn nodi y dylid oedi camau gweithredu sy'n destun anghydfod tra byddant yn cael eu datrys drwy'r mecanwaith datrys anghydfodau.

9. *Pa risgiau, os o gwbl, y mae Llywodraeth Cymru wedi'u nodi o ran y dull hwn?*

10. *Sut y bydd Llywodraeth Cymru yn rhoi gwybod i'r Senedd am anghydfodau a godir drwy'r Fframwaith?*

### **Tryloywder ac atebolrwydd**

Nid yw'r Fframwaith yn cynnwys gofyniad i'r llywodraethau roi'r wybodaeth ddiweddaraf i seneddau a rhanddeiliaid am ei weithrediad. Nid oes gofyniad ychwaith i gynnwys seneddau a rhanddeiliaid yn y broses o adolygu a diwygio'r Fframwaith.

11. *Sut y bydd y Senedd a rhanddeiliaid yn cael y wybodaeth ddiweddaraf am weithrediad parhaus y Fframwaith?*

12. *Sut y bydd y Senedd a rhanddeiliaid yn gallu cyfrannu at y broses o adolygu a diwygio'r Fframwaith?*

### **System rheoleiddio sylweddau ymbelydrol y DU**

Yn ôl y Fframwaith, ni fydd unrhyw drefniadau i atgynhyrchu'r gofynion o ran hysbysu a chyflwyno adroddiadau i'r Comisiwn Ewropeaidd er mwyn profi cydymffurfiaeth a digonolrwydd mewn perthynas â'r Cyfarwyddebau perthnasol.

Mae'r Fframwaith yn mynd ymlaen i ddweud bod sicrwydd o ran effeithiolrwydd system rheoleiddio sylweddau ymbelydrol y DU yn y dyfodol yn rhan o'r trafodaethau ehangach ynghylch llywodraethu amgylcheddol yn y dyfodol, yn dilyn ymadawiad y DU â'r UE a Chymuned Euratom. Mae hefyd yn nodi bod llywodraethau'n ystyried opsiynau a threfniadau ar gyfer dilysu systemau'r DU yn allanol, gan nad yw cynrychiolwyr Euratom bellach yn arolygu nac yn gwirio eu heffeithiolrwydd wrth fonitro allyriadau o safleoedd niwclear.

13. *Pa drefniadau llywodraethu sydd ar waith ar hyn o bryd i sicrhau effeithiolrwydd system rheoleiddio sylweddau ymbelydrol y DU?*

14. A allwch roi'r wybodaeth ddiweddaraf am y trafodaethau ehangach sy'n digwydd rhwng llywodraethau ynghylch llywodraethu amgylcheddol yn y dyfodol yn dilyn ymadawiad y DU â'r UE ac Euratom?

Byddwn yn ddiolchgar pe gallech anfon ymateb erbyn 3 Mawrth 2022.

Yn gywir,



Llyr Gruffydd AS,  
Cadeirydd Pwyllgor Newid Hinsawdd, yr Amgylchedd a Seilwaith

Croesewir gohebiaeth yn Gymraeg neu Saesneg.

We welcome correspondence in Welsh or English.

